

Morning Regional Dogri News Bulletin, 07th July 2024

मार्निंग डोगरी न्यूज़ बुलेटिन, समे. 09-20 Hrs

<><><><><><>

Headlines

1. प्रधानमंत्री नरेन्द्र मोदी होर कल्लै थमां रूस ते आस्ट्रिया दे त्रऊं दिनें दी यात्रा पर जा करदे न।
2. उपराज्यपाल मनोज सिन्हा होरें कलाकारें पर जोर पाया ऐ जे ओह जम्मू कश्मीर दी सांस्कृतिक विरासत गी होर समृद्ध बनादे होई इसी बढ़ावा बी देन।
3. दक्खनी कश्मीर दे कुलगाम च होए दे दऊं बक्ख-बक्ख टाकरें च इक आतंकवादी कमांडर सनें कुल 4 आतंकवादी मारे गे न।
4. जम्मू आधार शिविर थमां अज्ज 6 ज्हार 145 श्री अमरनाथ श्रद्धालुएं दा जत्था कश्मीर घाटी लेई रवाना होआ ऐ।
5. जम्मू दे डिवीजनल कमीशनर होरें खित्ते च हाईं शा बचाह सरबंधी तैआरिएं दा जायजा लैता।

<><><><><><>

PM Visit

प्रधानमंत्री नरेन्द्र मोदी होर रूस ते आस्ट्रिया दे त्रऊं दिनें दे दोरे पर कल रवाना होंगन। यात्रा दे पैहले हिस्से च मोदी होर रूस दी राजधानी मास्को च 22में रूस-भारत सलाना शिखर सम्मेलन च हिस्सा लेंगन। मोदी हुंदी एह रूस यात्रा राष्ट्रपति ब्लादिमीर पुतिन हुंदे खास साददे पर होआरदी ऐ। सम्मेलन च दौनें मुखें बश्कार व्यापक सरबंधें दी समीक्षा होग ते आपसी हितें सरबंधी बक्ख-बक्ख मुद्दें पर सोच बचार कीता जाग। रूस दा दौरा पूरा करिये मोदी होर मंगलवारें आस्ट्रिया पुज्जगंन। 41 बरें मगरा कुसै भारतीय प्रधानमंत्री दा आस्ट्रिया दा एह पैहला दौरा होग। इस दौरे दरान मोदी होर मास्को ते वियना च रवा'रदे भारतीय मूल दे लोकें कन्ने बी मलाटी करगंन। प्रधानमंत्री हुंदे इस दौरे बारे कल आस्ट्रियाई प्रधानमंत्री कार्ल नेहामर होरें इसी आस्ट्रिया लेई इक मानै आली गल्ल करार दिंदे होई आखेआ जे ओह बड़ी बेसब्री कन्ने मोदी हुंदे उत्थें पुज्जने गी बलगा करदे न।

<><><><><><>

Budget Session

संसद दा बजट सत्र इस म्हीने दी 22 तरीक थमां शुरू होग। पार्लिमानी मामले दे मंत्री किरें रिजिजू होरें इक सोशल मीडिया पोस्ट च दस्सेआ जे बजट सत्र 12 अगस्त तगर चलोग। उनें आखेआ जे केन्द्रीय बजट 2024-25 लोकसभा च 23 जुलाई गी पेश कीता जाग। रिजिजू होरें दस्सेआ जे राष्ट्रपति द्रौपदी मुर्मू होरें बजट सत्र आस्तै दौनें सदनं दा सत्र सद्दने दे केन्द्र सरकार दे प्रस्ताह गी मंजूरी देइ दिक्ती ऐ। लगातार त्रीह बारी प्रधानमंत्री बनने परैत एह नरेन्द्र मोदी हुंदी अगुवाई आली सरकार दा पैहला बजट होग। दौनें सदनं दे सांझे इजलास गी संबोधत करदे होई राष्ट्रपति होरें दोहराया हा जे एह बजट सरकार दी नीतिएं ते भविक्ख दी सोच गी दर्शाने आला बजट होग।

<><><><><><>

LG-Music Event

उपराज्यपाल मनोज सिन्हा होरें कलाकारें पर जोर पाया ऐ जे ओह जम्मू कश्मीर दी सांस्कृतिक विरासत गी होर समृद्ध बनाने दे कन्नो-कन्नी इसी बढावा बी देन। उनें आखेआ जे एह साढा सब्बने दा सांझा धेइया होना लोडचदा ऐ जे अस जम्मू कश्मीर दी अनमुल्ली कलात्मक विरासत गी आलमी सतह तोड़ी पजाचै। उपराज्यपाल होरें कोशुर राग पास्सेआ जम्मू कश्मीर दी कला, संस्कृति ते भाषा सरबंधी अकैडमी दे सैहयोग कन्ने कल श्रीनगर च आयोजित संगीत कार्यक्रम दरान बोला करदे हे। इस मौके पर उनें लोकें गी अपील कीती जे ओह कला, संस्कृति ते साहित्य दे खेत्तर च बन्न7सबन्नता दा जश्न मनान जेहड़ी भारत दी महानता दा स्रोत बी ऐ। उनें आखेआ जे कला ते संस्कृति समाज गी आपूं चै जोड़ने ते प्रोत्साहित करने दा कम्म करदी ऐ ते इसी इतिहास गी भविक्ख कन्नै जोड़ने आली इक तंद दे रूपै च दिखेआ जाना लोडचदा ऐ। सिन्हा होरें समाज च एकता, संबोध ते रमानदारी दा सनेहा फैलाने च कलाकारें दी महत्वपूर्ण भूमका पर लोह पाई। इस मौके पर उपराज्यपाल होरें सरबंधत खेत्तरें च महत्वपूर्ण योगदान देने आले कलाकारें गी सम्मानत बी कीता। उनें संगीत ते कला दे होरने स्वरूपें राएं कश्मीर दी सांस्कृतिक विरासत गी बढावा देने दे जतनें लेई कोशुर राग दी बी सराहना कीती।

<><><><><><>

JK-Kulgam Encounter

कुलगाम जिले च होए दे 2 बक्ख-बक्ख टाकरें च सुरक्षाबलें 4 आतंकवादिणं गी मारी मकाया ऐ। एह टाकरे फरीसल चिन्नीगाम ते मोदगाम इलाके च होए। मारे गेदे 4 च इक आतंकवादी कमांडर बी शामिल ऐ। पैहला टाकरा मोदरगाम ग्रां च शुरू होआ। इलाके च आतंकवादिणं दी मजूदगी बारे थहोई दी टकोहदी सूह पर कारवाई करदे होई सुरक्षाबलें इलाके दी पूरी घेराबंदी करी लैती ते तपाशी अभियान चलाया। मगरा फरीसल चिन्नीगाम च बी टाकरा भखी पेआ। टाकरे दरान 4 आतंकवादी मारे गे। खीरी जानकारी थहोने तगर गोलीबारी होआरदी ही।

<><><><><><>

DGP Doda

डोडा जिले च हाल च गै होई दिणं आतंकवाद सरबंधी घटनाएं मगरा जम्मू कश्मीर पुलस दे महानिदेशक आर. आर.स्वैन होरें मैहकमे दे होर दुए आला अफसरें कन्नै अज्ज डोडा दा दौरा लाया ते इस पहाड़ी जिले च कनून बवस्था ते सुरक्षा स्थिति दा मौके पर जायजा लैता। एडीजीपी कनून बवस्था विजय कुमार ते एडीजीपी जम्मू जोन आनंद जैन हुंदे कन्नै श्री स्वैन होर हाल च गै गंदोह च भखे दे टाकरे च शामिल पुलस अधिकारिणं, फौजिणं ते उंदे परोआर आलें कन्ने मलाटी लाई। ध्यानजोग ऐ जे इस टाकरे च 3 आतंकवादी मारे गे हे। उनें आतंकवाद खलाफ लड़ाई च एसपीओ दी भूमका दी सराहना बी कीती। डीजीपी होरें यूटी च माहौल खराब करने लेई आतंकवादिणं गी इत्त बक्खी भेजने ताई पाकिस्तान गी दोषी ठैहराया ते आखेआ.....बाईट

इस मौके पर डीजीपी होरें 7 एसपीओएं गी पुलस कांस्टेबल दे तौरा पर नियुक्त करने दे आदेश बी जारी कीते।

<><><><><><>

Amarnath Yatra

जम्मू दे भगवती नगर आले आधार शिविर थमां6 ज्हार 145 श्रद्धालुएं दा जत्था घाटी लेई रवाना होआ। एह श्रद्धालु 238 गड्डिणं दे काफले च सुआर होई श्री अमरनाथ जी दी पवित्र गुफा दे दर्शनें लेई निकले। इंदे च 4 ज्हार 695 मर्द, इक ज्हार 218 महिला, 19 बच्चे, 177 साधु ते 36 साध्वियां शामिल हियां। कुल 6 ज्हार 145 श्रद्धालु चा 2 ज्हार 677 श्रद्धालु बालटाल लेई ते 3 ज्हार 448 श्रद्धालु पहलगाम लेई रवाना होए।

<><><><><><>

Chief Secretary Drugs

मुख्य सचिव अटल ड्रग्स होरें सेहत मैहकमे पर जोर पाया ऐ जे ओह प्रदेश दे सब्बने बड़डे जिला अस्पतालें च इन-पेशेंट डिपार्टमेंट यानि आईपीडी सुविधा शुरू करने दिऐ संभावनाएं दा पता लान। एनसीओआरडी दी प्रदेश स्तर दी एपेक्स कमेटी दी 10मीं बैठक दी प्रधानता करदे होई उनें इक ऐसी तगड़ी प्रणाली स्थापत करने दी जरूरतै पर जोर पाया जेहूदे राऐ दवाइऐं दिऐ हट्टिएं पर छड़ी डाक्टरी सलाह पर गै दित्ती जाने आली दवाइऐं दी गैर-कनूनी बिक्री बंद होऐ। उनें बकाया रौंहदिऐं दवाइऐं दी हट्टिएं पर सीसीटीवी कैमरे लाने ते कम्प्यूअर राऐ बिल देने दी बवस्था विकसित करने पर बी जोर दित्ता। उनें आखेआ जे खास तौरा पर शैहरी इलाके च इनें सुविधाएं दे बगैर कुसै बी दवाई दी हट्टी गी चलने दी खुल्ल नेई दित्ती जानी लोड़चदी। उनें पुलस, स्कूली शिक्षा, ग्रामीण विकास विभाग, सेहत, शैहरी विकास ते आबकारी मैहकमें पर जोर पाया जे ओह लोकें ते खास करियै नोजवानें गी इस बारे मता जागरूक बनाने लेई नियमित तौर पर अभियान चलान। बैठक दरान मुख्य सचिव होरें गी दस्सेआ गेआ जे सेहत मैहकमे ने प्रदेश दे सब्बनें 7एं मैडिकल कालेजें च आईपीडी दियां सबबनें 20एं जिलें च नशा-मुक्ति केन्द्र बी कम्म करे करदे न।

<><><><><><>

Div.Com Jammu

जम्मू दे डिवीजनल कमीशनर रमेश कुमार होरें हाड़ें दे प्रबंधन दा जायजा लैने लेई मुत्तलका मैहकमे ते जम्मू खित्ते दे जिला प्रशासन कनूँ इक बैठक लाई। इस दरान जम्मू खित्ते दे डिप्टी कमीशनर, एसएसपी जम्मू, एसडीआरएफ दे कमांडेंट, जल शक्ति जम्मू दे चीफ इंजीनियर ते मुत्तलका अर्जेसिएं दे लोकें बैठक च वर्चुअल माध्यम राऐ हिस्सा लैता। डिवीजनल कमीशनर होरें जिले स्थाबै कीती गेदी तैआरिएं दा जायजा लैता। जिला प्रशासनें गी आखेआ गेआ जे ओह मुत्तलका मैहकमे ते सरबंधी अर्जेसिएं दे सांझे नियंत्रण कक्ष बनान तां जे इलाके च हाड़ जनेई स्थिति पैदा होने ते ओहूदे कनूँ निबड़ने दे कम्में गी सुचारू ढंगै सिर कीता जाई सकै। उनें हाड़ दे खतरे दी शौंका आली थाहरें दा पता लाने लेई आखेआ। उनें सरबंधी जिलें च मशीने, उपकरणें ते राहत समेयान गी ऐसी थाहर पर रखने लेई गलाया, जित्थूं हर थाहर तगर सखल्ले ते तौले पुज्जेआ जाई सकै।

<><><><><><>

Varun Welcome(byte)

राष्ट्रपति द्रौपदी मुर्मू हुंदे आस्सेआ शौर्य चक्र कनूँ सम्मानत कांस्टेबल वरुण सिंह हुंदा कतुआ दे बरवाल ग्रां च डिप्टी कमीशनर डॉ. राकेश मिन्हास, वरुण सिंह हुंदे परोआर ते ग्रामीणें आस्सेआ जोरदार सुआगत कीता गेआ। इत्थें एह दस्सना लाजमी ऐ जे राष्ट्रपति होरें जम्मू कश्मीर पुलस दे कांस्टेबल गी उंदे अदमद साहस, निष्ठा ते बहादुरी आस्तै शौर्य चक्र कनूँ सम्मानत कीता ऐ। आतंकवादी दे सफाए ते आतंकवादिऐं दे कब्जे थमां असला ते बरूद बरामद करने च उनें अहम भूमका नभाई। ग्रामीणें आस्सेआ वरुण सिंह हुंदा शानदार सुआगत कीता गेआ। उंदी इस कारकरदगी नै ग्रां जिले ते जम्मू कश्मीर दा नां रोशन कीता ऐ। इस मौके पर बोलदे होई कतुआ दे डिप्टी कमीशनर डॉ. राकेश मिन्हास होरें आखेआ.....बाईट

<><><><><><>